

Midada digl manader tecnic

Savognin Pencilularas: Nov manader tecnic

■ (pb) Siva dad otg onns scu directer tecnic tar Savognin Pencilularas SA è Gerhard Marti sa retratg digl sies post ord muteivs familiars. El bandunga la regiun. Scu igl sies successour è nia designia Curdin Baltermia da Salouf tgi era anfignen ossa substitut. La midada uffiziala succeda per igl 1. d'avost 2016. Savognin Pencilularas SA ò antschet las sias activitads economic-turistics a Savognin igl 1962. Chegl cun igl ampren la sotptgera ed igls runals vers igl Piz Martegnas. Igl 1967 cun la construcziun dalla gondla a Radons ed igls runals vers igl Piz Cartas. Igl svilup turistic ainten la regiun è sto ferm chels onns lò ed igls indrezs da transport digls skiunzs sen la muntogna ed ansomma l'antiera infrastruttura dall'interpresa è neida adattada ed amplifitgeida cuntinuadamaintg. Da menziunar è cò an spezial igl project da pionier cun igls amprens neivadoirs an Svizra igl 1978. Pero er investiziuns segl sector gastronomic sen la muntogna scu l'ustareia a Radons e pi tard igl restaurant da muntogna a Tigignas.



Christian Prinz (san.), igl manader administrativ da Savognin Pencilularas SA, e Curdin Baltermia, a parteir digl 1. avost manader tecnic.

Gl'en alloura suandos onns pi maiers aint igl turissem d'anviern ed ins ò antschet a dar duple muntada er alla stad. Uscheia cun la construcziun digl Lai Barnagn ansem cun igl cumeign da Savognin igl 1986.

Pi pacas frequenzas sen las pistas on genero pi pacas antradas. Ed ins ò betg savia far las investiziuns scu previa. Tuttegra ins ò fatg diversas investiziuns pi grondas igls davos onns. Tar chellas totga la sotptgera da seis da Somtgant a Martegnas, la gondla da 10 da Tigignas e Somtgant ed ena sanaziun ed amplificaziun digls neivadoirs.

Las proximas investiziuns tenor la direzziun strategica dall'interpresa fissan

ena gondla da Savognin a Tigignas ed enov restaurant da muntogna a Somtgant. An tge successiun e tenor tge plan da termin, glez ins fò dependent dallas frequenzas e zont dallas amprens antradas aint igl territori da skis. E persiva duvres sigl daples letgs tgods ainten la regiun.

Continuitad cun igl substitut
Savognin Pencilularas SA è tiers las difficultads antras las circumstanzas economicas digls davos onns igl pi grond partung privat an Surses. I lavouran ca. 30 persungas sur onn ed 80 durant la stachung d'anviern. Da chels tgi lavouran sur onn tar l'interpresa en ca. 25 tar igl

sarvetsch tecnic. Chel sarvetsch tgi è responsabel per las revisiuns ve digls indrezs da transport, tgossas da construcziun, l'antiera tecnica ed igl travagl scu tal. E chesta partiziuon dall'interpresa è sot la direzziun digl manader tecnic. D'anviern en chegl alloura ca. 60 persungas tgi lavouran tar igls indrezs da transport, tar la preparaziun dallas pistas u tar igl sarvetsch digls patroulleurs.

Siva digl 2010 è Gerhard Marti, derivond digl cantun Berna, sto segl post scu manader tecnic. Siva digl 1. otgover 2008 lavoura er Curdin Baltermia tar Savognin Pencilularas SA, siva tgi el veva fatg en amprenndissadi scu automaticher

a Coira. Igl 2009 ò el fatg la scola scu om digl rom da pencilularas a Winterthur e siva digl 2010 è el nia rancunaschia scu substitut digl directer tecnic.

Igls onns sessour en suandos anc divers curs an diversas direcciuns. Uscheia igl 2010 en electroseminar tar la Frey AG ed igl madem onn igl curs da patrouleur A ad Arosa. Igl 2013 ò Baltermia fatg en ulteriuor electroseminar tar la Sisag. En onn siva è igl curs da patrouleur B ad Andermatt sto segl program ed igl 2015 anc igl curs da sagliantar lavezgas er ad Andermatt. Er igl 2015 ò el anc fatg en curs scu manaschunz da maschinas da far pista. Sur chels onns en er anc stos diffe-

rents otters curs technics. E cotras ò el la duevla scolaziun per pudeir e saveir exequir la lavour sen chel post.

La tscherna seia er succedeida sen fundamaint dalla sia bunga tenuta ainten la lavour e per l'interpresa.

En pensum da responsabladad
Baltermia ò 32 onns, è marido ed igl sies nov post porta dasperas gronda variaziun er gronda responsabladad. Chegl eneda an chella direzziun tgi la siertad digl travagl seia garanteida per igls collaboratours e per igls giasts. Chegl monta tgi las lavours da mantignamaint e las revisiuns ve digl antier andamaint tecnic e maschinas vignan exqueidas consequentamaintg. Cò vogl an cass da basigns er per ramplazzar parts digls indrezs technics u maschinas. Chegl fò igl manader an atgna cumpetenza schi sa tracta da tgossas pi pitschnas u schiglio ansem cun igl manader administrativ Christian Prinz. Sa tractigl dad investiziuns pi grondas cun caracter strategic per l'interpresa vign naturalmointg er consulto igl cunsegl d'administraziun.

Durant igl anviern stattan er las dumondas da siertad an cumpetenza digl manader tecnic. Tot deir da tigneir saro igls indrezs e las pistas schi la situaziun da lavezgas è privlousa u schi igl vent è schi ferm tgi el savess caschunar donn e da persungas e material. En pensum digl manader tecnic è er da far la planisaziun digl de, parteir aint igl persunal e la lavour.

Igl mument è la gruppa digl sarvetsch tecnic vedlonder, dasperas las lavours da revisiun annualas, da sustigneir interpresas externas ve dalla renovaziun ed amplificaziun dalla staziun da pompas digls neivadoirs a Tigignas.

RTR Radiotelevision Svizra Rumantscha | SRG SSR | www.rtr.ch | al puls dal Grischun

RADIO

10.15 RADIONOVELA

Vita capita - episodio 924
La maridaglia



Ina lunga istorgia èsi stà: la relaziun tranter Lucia dal Volg e Roland Battaglia. Ina lunga istorgia plaina da grittas, frust e larmas. Però era ina istorgia da surpraisas. Uss maridan Lucia e Roland. La lunga istorgia po pia ir a fin cun in happy end. U na? Be tant: In vestgì piglia fieu. *Reschia: Michel Decurtins*

14.03 L'INSTRUMENTALA (REP.)

La Festa da musica districtuala a Lai (2. part)
Ils 4 da zercladur è Lai stà il lieu da setupada per 14 musicas dal district da musica III e per 7 musicas ospitantas. Las musicas en sa mesiradas en set differents classas cun lur produziuns concertantas. En la baselgia catolica da Lai han ellas sunà ils tocs da pag e cumbattì per ils puncts dals experts. RTR è stà preschent



a Lai ed ha registrà tut las produziuns da festa. En duas emissiuns purschain nus a vus ils tocs da las musicas dal district sco era discurs cun ils protagonistis. *Redacziun: Flavio Tuor*

19.00 LA POPULARA

Ils Fränzlis da Tschlin no. 5



Ils tschintg Janetts ed il tschintgavel album dals Fränzlis. L'album no. 5 dals Fränzlis da Tschlin represchenta la passiuon musicala dals tschintg Janetts. Tar ils Fränzlis da Tschlin prenda la generaziun giuvna sco era la schlatta suramaun. Restada è dentant l'interpretaziun professiuonala da musica populara e las melodias che uneschjan tradiziun ed innovaziun. *Redacziun: Josefina Gaudenz*

20.03 MARELLA (REP.)

Juhè! Globi discorra rumantsch



Tgi avess pensà quai: noss Globi prenda ses satgados e vegn en Grischun. « Globi en il Parc Naziunal » e « Globi und der Goldraub », quai en ils dus Globis che

nus mettain sin il Tavulin litterar. Co tuni sche Globi discorra rumantsch? E tge es la lingua da las muntanellas? Da questas e dad autras dumondas discutan Martin Camenisch e Clà Riatsch al Tavulin litterar. *Redacziun: Esther Krättli*

TELEVISION

11.00 CONTROVERS SIN SRF INFO (REP.)

Taglias per interpresas
Il parlament discuta la terza refurma da las taglias per interpresas. E puspè mancan suenter la refurma raps a la Confederaziun. Danunder prender quels raps en in temp da las cassas vidas? Ils socialdemocrats planiseschan il referendum ed attagan las partidas burgaisas. En il



Controvers discutan Silva Semadeni dal PS, Magdalena Martullo-Blocher dal PPS e Stefan Engler dal PCD.

17.40 TELESQUARD SIN SRF 1

L'emissiun d'infurmaziun sin SRF 1 cun suttitels tudestgs sin TXT 777 (repetiziun sin SRF info tranter las 18.00 e las 22.00)

DAPLI SIN www.rtr.ch

MONTREUX-RIVIERA 2016
La 34avla Festa da musica federala dals 10 fin 12-06 e dals 17 fin 19-06-2016

Das fins d'emna da festa cun 556 musicas, passa 25'000 musicantAs e 200'000 visitaders: in pèr cifras da la Festa da musica federala che vegn suenter 15 onns puspè organisada en Svizra franzosa. RTR è preschent ed emetta directamain da Montreux. En la tenda «Scène SSR» sper il center «2m2c» producescha RTR ensem cun las autras unitads da la SSR differents emissiuns interregionalas.

Fête Fédérale de Musique
Eidgenössisches Musikfest
Festa Federale di Musica
Festa da Musica Federala

Las emissiuns:		
<i>Venderdi, ils 17-06</i>	22-23.00: Artg musical	Montreux – produziuns concertantas
<i>Sonda, ils 18-06</i>	22-23.00: Artg musical	Montreux – C'est le ton qui fait la musique
<i>Dumengia, ils 19-06</i>	14-15.00: Artg musical (rep. glindesdi 14-15.00)	Montreux – ils Grischuns a la festa (2. part)

RTR Radiotelevision Svizra Rumantscha | SRG SSR

CUNTRASTS
mintga dumengia a las 17:25 sin SRF 1

«Cuntrasts» è l'emissiun da la Television Rumantscha che mussa temas, midadas, svilups e moviments dal mund rumantsch.